

आकाशवाणी

खबरां विजय बजाज कोला,

Morning Dogri (NSD) Bulletin 26-March-2026

खास-खास खबरां:-

- प्रधानमंत्री नरेन्द्र मोदी पच्छिम एशिया संघर्ष गी लेइयै अज्ज वीडियो कांफ्रेंस दे राएं सब्बनें राज्ये दे मुखमंत्रिये कन्ने चर्चा करगंन तांजे राज्ये दी त्यारिये ते योजनाएं दी समीक्षा कीती जाई सकै। चुनां आयोग नै औने आले विधानसभा चुनां लेई अखीरी मतदाता सूची प्रकाशित करी दिती ऐ।
- केरलम च चुनाव आयोग नै औने आहले विधानसभा चुनां लेई अखीरी मतदाता सूचि प्रकाशित करी दिती ऐ।
- विदेशमंत्री डाक्टर एस. जयशंकर होरे संयुक्त राष्ट्र च सुधारें दी मंग कीती ते फ्रांस च जी-7 समूह दी बैठक च ग्लोबल साउथ कन्ने जुड़े दे मुद्दे पुटटे।
- आर्थिक सहयोग ते विकास संगठन (OECD) नै भारत दी GDP विकास दर 2025-26 लेई 7 इशारिया 6 फीसद- 2026-27 लेई 6 इशारिया इक फीसद ते 2027-28 लेई 6 इशारिया 4 फीसद रौहने दा अनुमान लाया ऐ।
- राष्ट्रीय स्वतंत्र पार्टी (RSP) दे लीडर बालेन्द्र शाह अज्ज नेपाल दे प्रधानमंत्री दे तौरा पर सगंध चुकगंन।
- ते फुटबॉल च भारत नै पाकिस्तान गी त्रै-सिफर कन्ने हराइयै SAFF Under - 20 सैमीफाईनल च थाहर पक्की कीती।

PM -Meet

प्रधानमंत्री नरेन्द्र मोदी अज्ज संजा पच्छम एशिया संघर्ष पर विडियो कांफ्रेंस दे माध्यम कन्नै सब्बनें राज्ये दे मुखमंत्रिये कन्नै गल्लबात करगंन ते राज्ये दिये तयारिये ते योजनाएं दा जायजा लैडन। सूत्रे मूजब बैठक दौरान Team India दी भावना कन्नै सांझे ते संगठित जतनें गी जकीनी बनाने पर जोर दिता जाहग। हालांकि आदर्श आचार संहिता दे कारण चुनाऽ आले राज्ये दे मुखमंत्री इस बैठक च शामिल नई होगंन। एहदे शा पैहले प्रधानमंत्री मोदी होरे संसद दे दौनें सदनं च पच्छम एशिया च चला करदे संघर्ष पर ब्यान दिता हा। भारत दे रौऽ गी भलेआ स्पष्ट करदे होई उ'नें आखेआ हा जे सरकार पेट्रोल, डीजल, तेल, गैस ते हैले दी बवस्थित आपूर्ति जकीनी बना करदी ऐ। उ'नें सदन गी सूचित कीता हा जे भारत नै पिच्छले 11एं बरे च ऊर्जा आयात दे अपने स्रोते गी 27 मुखे थमां बधाइये 41 मुखे तगर करी दिता ऐ-जेहदे नै कुसै इक खेतर पर निर्भरता घट्ट होई गई ऐ।

<><><><><><>

Keralam -FCI

केरलम च औंदे विधानसभा चुनाएं लेई खीरी मतदाता सूचि कल रातीं प्रकाशित करी दिती गई। इस सूचि दे मताबक केरलम च कुल 2 करोड़ 71 लख 42 जहार 952 मतदाता न। इस सूची च 19एं बरे शा हेठली उम्री दे 4 लख 66 जहार 408 नमें मतदाताएं दे नांऽ बी शामिल न। एहदे इलावा राज्य च 54 मतदाता ऐसे बी हैन- जिंदी उम्र 110 बरे शा मती ऐ। खीरी मतदाता सूची दे प्रकाशित होने ते असेम्बली चुनाएं

लेई नामज़दगी वापस लैने दी प्रक्रिया सबूरी होने दे बाद हुन केरलम- बड्डे स्तर पर चुनांस अभियान लेई पूरी चाल्ली त्यार ऐ।

<><><><><><>

EAM –UNSC Reforms

बदेश मंत्री डाक्टर एस. जयशंकर होरें कल जी-7 बदेश मंत्रियें दी बैठक G-7 FMM च संयुक्त राष्ट्र सुरक्षा काउंसल च सुधार दी फौरी लोड़- शांति रक्षक अभियानें गी बवस्थित करने ते मनुकखी आपूर्ति श्रृंखला दे सशक्तिकरण दा जिक्र कीता। जी-7 बदेश मंत्रियें दी बैठक फ्रांस दे अब्बाय डेस वॉक्स-डे-सेर्ने च होआ करदी ऐ। सोशल मीडिया दी इक पोस्ट च डाक्टर जयशंकर होरें आखेआ जे उ'नें आलमी सतह पर शासन बवस्था च सुधार बारे गल्लबात कीती ऐ। उ'नें ऊर्जा चुनौतियें- हैलें सरबन्धी आपूर्ति ते खाद्य सुरक्षा गी लेइयें ग्लोबल साउथ दे मुख्यें दियें चेंताएं गी चेचे तौर पर पुट्टेआ। बदेश मंत्री होर जी-7 देसें दे बदेश मंत्रियें दी बैठक च हिस्सा लैने लेई फ्रांस दी दंडु दिनें दी जातरा पर न।

<><><><><><>

India- GDP Growth

आर्थिक सहयोग ते विकास संगठन OECD ने भारत दी GDP विकास दर 2025-26 लेई 7.6 फीसद- 2026-27 लेई 6.1 फीसद ते 2027-28 लेई 6.4 फीसद आंकी ऐ। एहदे नै भारत दुनिया दी सब्बनें शा तेजी कन्नै बधदी प्रमुख अर्थबवस्था बने दा रौहग। OECD दी अंदरुनी आर्थिक आउत्लुक रिपोर्ट च आखेआ गेआ ऐ जे पच्छिम एशिया च चला रदा संघर्ष वैश्विक अर्थबवस्था दी मज़बूती दा म्तेहान लै'करदा ऐ।

होर्मुज जल डमरु मध्य थमां माल झुआई रुकने ते किश ऊर्जा ढांचे दे बंद होने जां तबाह होने करी ऊर्जा दिये कीमते च बाददा होआ ऐ। रिपोर्ट च आखेआ गेआ ऐ जे चीन दी विकास दर 2025 च 5.0 फीसद कोला घटिये 2026 च 4.4 फीसद ते 2027 च 4.3 फीसद रौहने दा अंदाजा ऐ। तौआई आलमी सतह पर GDP दी विकास दर बरे 2026 च 2.9 फीसद पर स्थिर रौहने दे मेद ऐ।

.<><><><><><>

Nepal -PM

राश्ट्री स्वतंत्र पार्टी RSP दे नेता बालेन्द्र शाह अज्ज नेपाल दे प्रधानमंत्री दे तौर पर संगंध चुक्कडन। एह समारोह काठमांडू दे शीतल निवास च स्थित राष्ट्रपति दफतरै च मकामी समें मूजब दपैहरी 12 बज्जिये 34एं मिन्टे पर होग। बालेन्द्र शाह कल RSP संसदी दल दे नेता चुने गे हे। उन्दी पार्टी ने जंदी 5 मार्च गी होए दे संसदी चुनाएं च बड्डी जित हासल कीती ही। रैपर थमां सियासतदान बने दे 35एं बरे दे बालेन्द्र शाह नेपाल च सर्वोच्च कार्यकारी औहद्धा सांभने आले मधेस इलाके दे पैहले व्यक्ति बी होडन। पिच्छले बरे नेपाल च होए दे Gen-Z दे हिंसक बरोध-प्रदर्शने परैन्त करोआए गेदे पैहले आम चुनांस पर पारम्परिक सियासी पार्टिये गी बड्डा झटका लग्गा ऐ।

<><><><><><>

LG/CM -Gratitude

लैफ्टिनेट गवर्नर मनोज सिन्हा ते मुखमंत्री उमर अब्दुल्ला होरे जम्मू-कश्मीर गी बाद्दू केन्द्री मदाद दे तौरा पर 5 जहार करोड़ जारी करने लेई प्रधानमंत्री नरेन्द्र मोदी, गृह मंत्री अमित शाह ते खजाना मंत्री निर्मला सीतारमण हुंदा तहे-दिल कन्नै आभार

प्रगट कीता ऐ। एल.जी सिन्हा होरें आखेआ ऐ जे इस बाद्दू मदाद कन्नै केन्द्र शासत प्रदेश दे माली हालात गी मजबूत करने च मदद होग। उनें अग्गे आखेआ जे एह अहम मदद बजट दी कमी गी दूर करोग- प्रोजैक्टें गी समें पर सबूरा करने दी गारंटी देग- बुनियादी ढांचे गी मजबूत करग ते स्थायी समृद्धि लेई लम्में समें तग्गर चलने आले मौकें पैदा करियै जम्मू-कश्मीर दी जोरदार आर्थिक वृद्धि गी बढ़ावा देग- जिल्ले के मुखमंत्री उमर अब्दुल्ला होरें आखेआ जे एह मदद समें पर थोई ऐ ते एह मते जरूरी विकास जतनें गी मती मजबूत करोग- बुनिदायी ढांचे कन्नै जुड़ी परियोजनाएं च तेजी आनौग ते समूलचे जम्मू-कश्मीर च लोकें दी भलाई-बेहतरी गी बदाने दा कम्म करोग।

<><><><><><>

Assembly Proceedings

जम्मू-कश्मीर विधानसभा दे बजट इजलास दा दूआ गेड़ अज्ज हंगामेदार रौहने दे असार न, कीजे विपक्षी दल सरकार गी ओहदे चुनावी वायदें ते राज्य दा दर्जा ब्हाल करने दे मुद्दे पर घेरने दी त्त्यारी च ऐ। आकाशवाणी जम्मू संवाददाता दी रिपोर्ट मुजब सत्र च मता हंगामा होने दे असार न- कीजे विपक्षी दल दे मिम्बर बक्ख-बक्ख मुद्दें पर निजी सदस्यें दे विधेयक ते प्रस्ताव गी आनने दी त्त्यारी च न। स्पीकर अब्दुल रहीम राथर होरें आखेआ ऐ जे इजलास कन्नै जुड़ी दिआं सब्बै जरूरी त्त्यारिआं पूरियां करी लैतियां गेड़ियां न ते इस गल्लै पर खास ध्यान दिता गेआ ऐ जे सत्र बिजन कुसै रुकावट दे चले ते समें दा सेही-सेही इस्तेमाल कीता जा।

<><><><><><>

CM -Cabinet Meet

मुख्यमंत्री उमर अब्दुल्ला हों वीरवारें जम्मू च कैबिनेट दी इक बैठक दी प्रधानता कीती, जेदे च पूरे केन्द्र शासत प्रदेश च विकास-बाददे दी अहम पैहलकदमियें ते शासन दी प्राथमिकताएं पर ध्यान दिता गोआ। जम्मू-कश्मीर दे मुख्यमंत्री दफतरै आसेआ “X” (ट्वीटर) पर कीती गई इक पोस्ट मुजब बैठक च बुनियादी ढांचे कन्नै जुड़े प्रोजैक्टें दी प्रगति दी समीक्षा कीती गई ते उनें गी तेजी कन्नै सबूरा करने दी जरूरत पर जोर दिता गोआ। कैबिनेट नै सार्वजनिक सेवाएं दी बंडड सरबन्धी तौर-तरीकें गी मजबूत करने ते समूलचे जम्मू-कश्मीर च सब्बनें गी कन्नै लेइयें चलने आले विकास कम्में च तेजी आनने पर जोर दिता, तां””जे केन्द्र शासत प्रदेश दे सब्बनें इलाकें दे लोकें गी एहदा फायदा थहोई सकै।

<><><><><><>

SAF- Football

दक्खन एशियाई फुटबॉल महासंघ-सैफ अंडर-20 प्रतियोगिता च कल मजूदा चैम्पियन भारत नै पाकिस्तान गी 3-सिफर कन्नै हराइयें अपने अभियान दी शानदार शुरुआत कीती। इस जित दे कन्नै भारत नै प्रतियोगिता दे सैमीफाईनल च थाहर पक्की करी लैती ऐ- जिसलै के पाकिस्तान इस प्रतियोगिता चा बाहर होई गोआ ऐ। भारत नै खेड्ड दे त्रियें मिन्ट च विशाल यादव दे गोल कन्नै बढ़त हासल कीती। प्रतियोगिता च कल गुप-बी दे सैमीफाईनल मुकाबले च भारत दा सामना बंगलादेश कन्नै होग।

<><><><><><>

Khelo India Tribal Games

छत्तीसगढ़ च चला करदी “खेलो इंडिया जनजाती” खेड्ढे दे दुए ध्याड़े कल हॉकी- फुटबाल- तारी मारने ते भार तुलकने दिआं प्रतियोगितां आयोजित कीतिआं गेइयां। कर्नाटक दे तारु मणिकांत एल होरें 200 मीटर व्यक्तिगत मेडलें च सुन्ने दा तगमा जितियें लगातार त्रीया तगमा अपने नांs कीता। ओडिशा दी अंजलि मुंडा ने महिलार्यें दे 200 मीटर व्यक्तिगत मेडले च सुन्ने दा तगमा जितियें प्रतियोगित दा दुआ सुन्ने दा तमगा हासल कीता। प्रतियोगिता दे अज्ज त्रीये दिन तारी मारने- भार तुलकने- हॉकी- फुटबॉल ते कुश्ती दे मुकाबले होडन।

<><><><><><>

IPL 2nd Phase

भारती क्रिकेट कंट्रोल बोर्ड -BCCI नै Indian Premier League -IPL दे दुए चरण च कार्यक्रम जारी करी दिता ऐ। Play Off दे आयोजन आली थाहरें बारे जानकारी मगरा सांझी कीती जाहग। दुए चरण च 12एं शैहरें च 50 मैच खेड्ढे जाडन। इंदे च बेंगलुरु- मुम्बई- चेन्नेई- कोलकाता ते दिल्ली शामिल न। एह मैच 13 अप्रैल थमां 24 मई धोड़ी चलडन। दुए चरण दे पैहले मैच च हैदराबाद च Sunrises हैदराबाद ते राजस्थान Royals आमने-सामने होडन। IPL दा पैहला चरण कल्लै थमां शुरु होआ करदा ऐ ते एहदे उदघाटनी मैच च कल संजा मजूदा चैम्पियन Royal Challengers बेंगलुरु दा मुकाबला बेंगलुरु दे एम. चिन्नास्वामी स्टेडियम च Sunrises हैदराबाद दे कन्नै होग।

<><><><><><>